

化州志

一
函
冊
函

原
书
缺
页

原
书
缺
页

原
书
缺
页

原 书 缺 页

壘若等譟而射旣戰僞遁賊薄營伏發注射由是
賊震駭王師奮戰執安慶和收衛州及王師衛州
之戰大風戰敗子儀以朔方軍保河陽魚朝恩大
忌其功因是譖之帝遂召子儀還以趙王爲天下
兵馬元帥李光弼副之代子儀領朔方兵子儀雖
失軍無少望乃心朝廷思明再陷河洛西戎逼擾
京輔天子旰食乃授邠寧鄜坊兩節度使仍留京
師議者謂子儀有社稷功而孽寇首鼠乃置散地
非所宜也帝亦悟之上元初詔爲諸道兵馬都統
以管崇嗣副之率英武威遠兵及河西河東鎮兵

繇邠寧朔方大同橫野軍以趨范陽詔下爲朝恩
沮解明年光弼敗印山失河陽又明年河中太原
亂上憂二軍與賊合而少年新進望輕不可用遂
以子儀爲朔方河中北廷潞儀澤沁等州節度行
營兼興平定國副元帥進封汾陽郡王屯絳州時
帝已不豫羣臣未有見者子儀請曰老臣受命將
死于外不見陛下目不瞑帝引至卧內謂曰河東
事一以委卿子儀嗚咽流涕賜御馬銀器雜綵別
賜絹九萬子儀至屯誅首惡王元振等數十人太
原亦治之諸鎮皆惕息代宗立程元振自謂于帝

有功忌宿將難制離構百計因罷子儀副元帥加
實戶七百爲肅宗山陵使子儀懼讒且成盡哀肅
宗所賜詔勅千餘篇上之因自明詔曰朕不德詒
大臣憂朕甚自愧自今公毋有疑初帝與子儀平
兩京同天下憂患至是悔悟眷禮彌重時史朝義
尙盜洛帝欲使副雍王率師東討爲朝恩元振交
訾之乃止會梁崇義據襄州叛僕固懷恩屯汾州
陰召回紇吐蕃寇河西殘湮州犯奉天武功遽拜
子儀爲關內副元帥鎮咸陽初子儀自相州罷歸
京師部曲離散逮承詔麾下才數十騎驅民馬補

行隊至咸陽虜已過渭水並南山而東天子跳幸
陝子儀聞之流涕董行營還京師遇射生將王獻
忠以穀騎叛劫諸王欲奔虜子儀讓之取諸王送
行在乃率騎南收兵得武關防卒及亡士數千軍
寢完會六軍將張知節迎子儀洛南大閱兵屯商
州威震關中乃遣知節帥兵爲前鋒營韓公堆擊
鼓謹山張旗幟夜叢萬炬以疑賊初殷仲卿募兵
藍田以勁騎先官軍爲游奕直度澧民詒虜曰郭
令公來虜懼會故將王甫結俠少夜鼓朱雀街呼
曰王師至吐蕃夜潰於是遣大將李忠義屯苑中

渭北節度使王仲昇守朝堂子儀以中軍繼之饒
生將王撫自署京兆尹亂京城子儀斬以徇破賊
書聞帝以子儀爲京城留守自變生倉卒賴子儀
復安故天下皆咎程元振羣臣數論奏元振懼乃
說帝都洛陽帝可其計子儀曰雍州古稱天府右
隴蜀左嶠函襟馮終南太華之險背負清渭濁河
之固地方數千里帶甲十餘萬兵強士勇眞用武
之國秦漢所以成帝業也後或處而泰去而亡者
不一姓故高祖先入關定天下先帝興朔方誅慶
緒陛下席西土戮朝義雖天道助順亦地勢則然

比吐番馮陵而不能抗者臣能言其略夫六軍皆
市井人竄虛名逃實賦一日驅以就戰有百奔無
一前又官豎掩迷庶政荒奪遂令陛下彷徨暴露
越在陝服斯委任非人豈秦地非良哉子儀又稱
洛邑燒毀難居又言願陛下斥素餐去冗食抑閹
寺任直臣薄征弛役卹隱撫鰥委宰相以簡賢任
能付臣以訓兵禦侮則中興之功日月可冀惟時
邁亟還見宗廟謁園陵再造王家以幸天下帝得
奏泣謂左右曰子儀固社稷臣也朕西決矣乘輿
還子儀頓首請罪帝勞之曰用卿晚故至此乃賜

鐵券圖形凌煙閣僕固懷恩縱兵掠并汾屬縣帝
患之以子儀兼河東副元帥河中節度使鎮河中
廣德二年進太尉兼領北道邠寧涇原河西通和
吐番及朔方招撫觀察使辭太尉不拜懷恩誘吐
番回紇党項數千萬人寇朝廷大恐詔子儀屯奉
天子儀馳至奉天諸將請擊之子儀曰賊深入利
速戰堅持待之賊果遁子儀至自涇陽恩賚崇纒
進拜尙書令懇辭不聽詔趣詣省視事又敕賜五
百騎執戟寵衛子儀確讓以爲不可詔許之仍賜
美人六人永泰元年詔都統河南道節度行營復

鎮河中懷恩盡說吐番回紇党項羌渾奴刺等三十萬掠涇邠躡鳳翔入醴泉奉天京師大震于是急召子儀屯涇陽軍纔萬人比到虜騎圍已合乃使李國臣高昇魏楚玉陳回光朱元琮各當一面身自率鎧騎二千出入陣中回紇怪問是爲誰報曰郭令公驚曰令公存乎懷恩言天可汗棄天下令公卽世茲非懷恩欺我乎子儀使諭之曰昔回紇涉萬里戡大憝助復二京我等休戚同之今乃弃舊好助叛臣一何愚也被背主弃親于回紇何有回紇曰本受懷恩之欺令公若在可得見乎子

儀曰虜衆數十倍今力不敵吾將示以至誠遂與數十騎出見其大酋曰諸君同艱難久矣何忽亡忠誼而至是邪回紇舍兵下馬拜曰果吾父也子儀卽召飲遺綵結歡誓好如初因責吐番負國會懷恩暴死羣虜無統子儀命將白元光合回紇衆破吐番十萬于靈臺子儀自涇陽來朝加實封二百戶還河中大歷二年以後吐番屢寇屢敗之乃以子儀兼邠寧慶節度使屯邠州回紇赤心請市萬馬子儀奏之以爲回紇有大功中原況須馬臣請內一歲俸佐馬直詔不聽人許其忠九年入對

吐番事上書稱長久之策又自陳老詔不許德宗
嗣位詔攝冢宰賜號尙父進位太尉中書令八十
五薨帝悼痛廢朝五日贈太師陪葬建陵謚曰忠
武配饗代宗詔墳崇二丈八尺以表元功

論曰子儀校中書考二十四身係天下安危者二
十年人以爲勳名無前也又其洞開內室倏滅音
樂人以爲知幾自厚也予曰不然子儀具文武全
德只是有大臣之量以智勇論子儀者細矣哉使
當時知子儀爲長者不以讒邪間之詔趣省視事
以實趣之俾盡相道子儀用人行政諒襄治道哉

宋太傅忠愍寇公

公諱準字平仲幼通春秋三傳年十六太宗幸魏
準以父陷蕃上書行在辭色激昂舉止無畏太宗
壯之命有司記其姓名後三年舉進士太宗取人
往往罷去年少或教準增年準曰準方進取可欺
君邪及中第太宗知其名授大理評事出知巴東
縣徵賦不出符移唯具鄉里姓名揭縣門百姓莫
敢後期手植栢於縣庭民以比甘棠謂之寇公栢
累遷殿中丞通判鄆州召試學士院授右正言直
史館爲三司度支推官轉鹽鐵判官會詔百官言

事準極利害太宗益器重之擢尙書虞部郎中樞
密院直學士判吏部東銓嘗奏事殿中語不合帝
怒起準輒引帝衣令帝復坐事決乃退上由是嘉
之曰朕得寇準猶文皇之得魏徵也淳化二年春
大旱太宗延近臣問時政得失衆以天數對準獨
曰洪範天人之際應若影響大旱之徵蓋刑有所
不平也太宗怒問所以不平狀準曰願召二府言
之二府入準曰頃者祖吉王淮皆侮法受賕吉賊
少乃伏誅淮以叅政汚之弟盜主守財至千萬止
罰仍復其官法豈平平太宗問汚汚頓首謝卽皆